

摘藻堂四庫全書薈要

史部

欽定四庫全書薈要卷六千九百十一

史部

明史卷三百十九

大學士張廷玉等奉 敕修

列傳第二百七

廣西土司三

泗城

利州

龍州

歸順

向武

奉議

江州

思陵 廣東瓊州府附

泗城州宋置隸橫山寨元屬田州路其界東抵東蘭西抵上林長官司南抵田州北抵永寧州洪武五年征南副將軍周德興克泗城州土官岑善忠歸附授世襲知州十三年善忠子振作亂寇利州廣西都司討平之十四年善忠來貢方物二十六年振遣人貢馬及方物詔賜以鈔錠宣德元年女土官盧氏遣族人岑臺貢馬及銀器等物賜賚有差八年致仕女土官盧氏奏襲職土

官岑豹率土兵千五百餘人謀害已又棄毀故土官岑
瑄塑像所為不孝難俾襲職豹叔利州知州顏亦奏豹
興兵謀殺盧氏州民被害都督山雲奏豹實故土官瑄
姪人所信服應襲職盧氏瑄妻豹伯母初借襲令致仕
宜量撥田土以贍終身仍請敕豹無肆侵擾兵部請從
雲奏帝命行人章聰侯璉齋敕諭雲會三司巡按究豹
與盧氏是非從公判決正統元年豹遣人入貢二年豹
攻利州掠其叔顏妻子財物朝廷官至撫諭負固不服

增兵拒守雲以聞乞發兵勦之帝敕雲曰蠻夷梗化罪固難容然興師動衆事亦不易其更遣人諭之五年顏秦豹侵占及掠擄罪頭目黃祖亦秦豹殺其弟籍其家瑄女亦秦豹占奪田地人民囚其母盧氏帝復遣行人朱昇黃恕齎敕諭之并敕廣西貴州總兵官親詣其地令速還所侵掠如仍不服相機禽捕其明年總兵官柳溥秦行人恕昇同廣西三司委官諭豹退還原占利州地豹時面從及回占如故令顏欲以利州利甲等莊易

泗城古那等甲開設利州衙門宜從其請發附近官軍
送顏赴彼撫治蠻民倘豹仍拒逆則率兵勦捕從之八
年豹遣人奉貢賜綵幣十年豹復奏顏占據其地帝令
速予議處不可因循貽邊方害成化元年豹聚衆四萬
攻劫上林長官司殺土官岑志威據其境土兵部言豹
強獷如此宜調兵禽捕明正典刑從之未幾豹死弘治
三年土官知州岑應復據上林長官司及貴州鎮寧等
處一十八城時恩城土官岑欽攻奪田州府逐知府岑

溥應與欽黨既復相讐兩家父子交相讐殺事聞兵部
奏欽連年構禍而應黨之復據上林長官司流毒不少
今天厭禍假手相殘實地方之幸應所占鄰壤及土官
印信數多亦宜勘斷以除禍本并令應弟接退還侵地
及印信乃許承襲泗城地廣兵多宜選頭目量授職銜
分轄以殺其勢詔下總鎮官區處接遣人朝正賜絲緞
鈔錠十年總督鄧廷瓚奏接往年隨征都勻府江等處
有功乞畧其祖父罪令承襲世職以圖報効廷臣議勅

印侵地雖係接祖父罪然再四撫諭接不肯歸之於官
遽使襲職則志益驕非馭土官法十二年田州土目黃
驥作亂要接為聲援殺掠男婦劫燒倉庫民廬又劫府
學及橫山驛印記遂據興仁十四年貴州賊婦朱魯作
亂提督王軾請調接領土兵二萬營於砦布河因敕接
自備兩月餉剋期赴調十八年泗城土官族人岑九仙
奏自始祖岑彭以來世襲土官至豹子應罹欽之禍子
孫滅亡殆盡其弟接衆推護印累著勞勩乞令襲職俾

掌轄蠻衆兵部尚書劉大夏等議豹乃叛臣餘孽子應復自取滅亡今接者人皆傳稱為梁接非應親枝又不
知岑九仙是何逋逃冒為奏擾臣大夏先在兩廣見岑
氏譜岑之始祖木納罕於元至正年間與田州知府之
祖伯顏一時受官今九仙妄援漢岑彭世次塵瀆聖聽
請治其罪其岑接應襲與否前已令鎮巡官勘奏岑九
仙雖蠻人難以深究亦當摘發以破其奸從之正德十
二年泗城及程縣各遣官族來貢後期賞減半泗城貢

厚仍全給之嘉靖二年田州岑猛率兵攻泗城拔六寨進薄州城克之接告急軍門言猛無故攻寨猛言接非岑氏後據其祖業欲得所侵地詔下勘處十六年田州盧蘇作亂泗城土舍岑施以兵納岑邦佐兵敗弗克納二十七年詔土舍施襲替免赴京以嘗聽調有勞也隆慶二年泗城蠻黃豹黃豸等據貴州程番府麻嚮大華等司時出擄掠官軍勦之豹等遁去萬歷二年泗城土官岑承勲等貢馬及香鑪等物四十一年土官岑雲漢

貢方物初雲漢乃紹勲嫡嗣紹勲寵庶孽雷漢頭目黃
瑪等從中煽禍以至焚劫稱兵雲漢給母出印扶弟以
奔撫按以聞廷議請釋紹勲罪以存太倫杖雷漢黃瑪
等以息囂孽雲漢從寬削銜戴罪管事詔可天啟二年
巡撫何士晉請復雲漢知州職量加都司職銜令率土
兵援黔從之泗城延袤頗廣兵力亦勁與慶遠諸州互
相雄長其流惡自豹而應而接且三世領縣一曰程縣
長官司二曰安隆曰上林 程縣在泗城州之東北舊

號程丑莊明初歸附隸泗城州洪武二十一年改為縣
編戶一里後改屬慶遠府尋復隸泗城州設流官知縣
正統間為岑豹所逼棄官遁去典史攝印旋亦罹害豹
遂奪其印據縣治事聞屢遣官諭之歷岑應岑接凡七
十餘年不服嘉靖二年接為諸土官攻殺督府遣官按
問得縣印貯於官後僅存荒土泗城南丹那地俱欲得
之時治兵相攻云 安隆長官司東抵泗城西抵雲南
南抵上林長官司北抵貴州宣慰司元泗城州地也洪

武元年泗城州土官岑善忠以次子子得領安隆峒三十年子得來朝貢馬設治所永樂元年設安隆長官司以子得為長官撫其衆十二年貢馬賜鈔幣予世襲

上林長官司東北俱抵泗城界西抵安隆長官司南抵雲南宋元號上林峒屬泗城州明興因焉永樂中置長官司以泗城州土官岑善忠三子子成為長官撫其民永樂四年子成遣子保貢方物賜鈔幣自是貢賜不絕成化元年泗城岑豹攻劫上林殺長官志威滅其族劫

印占其境土兵部移文議豹罪仍以地與印給上林弘治三年上林長官司遣頭目入貢禮部以過期至給半賞既而泗城岑應復奪據上林長官司然正嘉隆萬間朝貢猶時至

利州漢屬交趾號阪麗莊宋建利州隸橫山寨元因焉土官亦岑姓洪武初歸附授知州以流官吏目佐之直隸布政司宣德二年利州知州岑顏遣頭目羅嚮貢馬正統元年泗城岑豹侵據利州地并掠顏妻子財物總

兵官山雲以聞帝敕鎮巡官撫諭之四年顏遣族人岑
忻貢銀器方物五年顏奏本州地二十五甲被豹興兵
攻占母覃被囚妻財被掠累奉敕撫諭猖獗不服帝遣
行人黃恕朱昇敕諭豹事具前傳七年豹復與顏相仇
殺帝敕總兵官吳亮宣布恩威令各罷兵而豹終殺顏
及其子得奪州印去遂以流官判州事數十年間屢經
諸司勘奏移檄督追歷岑應岑接二世如故嘉靖二年
歸併泗城

龍州古百粵地漢屬交趾唐始置龍州宋仍之元大德
中陞州為萬戶府洪武二年龍州土官趙帖堅遣使奉
表貢方物詔以帖堅為龍州知州世襲八年改隸廣西
布政司時帖堅言地臨交趾所守關隘二十七處有警
須申報太平達總司比報下已涉旬月恐誤事機乞依
奉議泗城二州隸廣西便從之十六年帖堅以孝慈皇
后喪上慰表貢馬及方物賜綺帛鈔錠有差二十一年
帖堅病無子以其從子宗壽代署州事帖堅卒宗壽襲

鄭國公常茂以罪謫居龍州帖堅妻黃氏有二女一為
太平州土官李圓泰妻茂納其一為妾時宗壽雖襲職
帖堅妻猶持土官印與茂圓泰專擅州事數陵逼宗壽
會茂以病卒其閭者趙觀海等亦肆侮宗壽宗壽乃與
把事等以計取土官印上奏言茂已死并械觀海等至
京於是帖堅妻惶懼使人告宗壽擄掠又與圓泰謀劫
茂妾并其奴婢往太平州又盡掠趙氏祖父官誥諸物
又欲併取龍州之地乃自至京告宗壽實從予不應襲

宗壽亦上章言狀帝乃詔宗壽勿問下吏議帖堅妻與
圓泰罪既而以遠蠻俱釋之久之復有人告茂匿龍州
未死前宗壽所言皆妄遂詔右軍都督府榜諭宗壽及
龍州官民言昔鄭國公常茂有罪上以開平王之功不
忍遽置於法安置龍州土官趙帖堅故其妻與茂結為
婚姻誘合諸蠻肆為不道帖堅姪宗壽襲職與黃氏互
相告訐言茂已死上以功臣子猶加憐憫釋二人告訐
罪令有人言茂實未死宗壽等知狀已遣散騎舍人諭

宗壽捕茂延玩使者久不復命其意莫測特命榜諭爾
宗壽等知之如茂果存則送至京師以贖罪如茂果死
宗壽亦宜親率大小頭目至京具陳其由廣西布政司
言宗壽屢詔赴京拒命不出又言南丹奉議等蠻梗化
帝復命致仕兵部尚書唐鐸往諭宗壽訖不從命詔發
湖廣江西所屬衛所馬步官軍六萬餘各齎三月糧期
以秋初俱赴廣西命都督楊文佩征南將軍印為總兵
官都指揮韓觀為左將軍都督僉事宋晟為右將軍劉

真為叅將率京衛馬步軍三萬人至廣西會討龍州及

奉議南丹向武等州叛蠻師行帝撰文遣使祭嶽鎮海

瀆復遣禮部尚書任亨泰監察御史嚴震直使安南諭

以討龍州趙宗壽之故令陳日焜慎守邊境毋助逆勿

納叛遣人論文調南寧衛兵千人江陰侯吳高領之柳

州衛兵千人安陸侯吳傑領之皆令其建功自贖又詔

文等如兵至龍州宗壽親來見具陳茂已死之由則宥

其罪若詐遣人來則進兵討之既鐸還京言宗壽伏罪

來朝乞罷兵勿征詔文移兵於奉議仍命鐸至軍叅軍事宗壽偕耆民農里等六十九人來朝謝罪貢方物宗壽死子景升襲景升死無嗣以叔仁政襲仁政再傳為趙源源死無子思思土官岑濬率兵攻田州回劫龍州奪其印納故知府源妻岑氏詔下鎮巡官勦賊而議立為源後者以源庶兄浦有二子相居長當立相弟楷不能無望謀於岑氏以僕韋隊子璋詭云遺腹岑氏恃姪猛兵雄楷遂奏言璋實源子當立為相所篡事下督府

勘未決璋賂鎮守太監傅倫及錦衣舍人詭稱有詔檄
猛調二萬兵納璋入龍州左江大震相挈印奔浣村都
御史楊旦討韋璋殺之相乃歸相二子長燧次寶相枝
拇寶亦枝拇相絕愛之曰肖我當立猛乃以寶去髡為
奴嘉靖元年相死州人立燧楷弑之州人立其族弟煖
時王守仁提督兩廣幕客岑伯高用事楷賂伯高言煖
非趙氏裔當立者楷也遣上思州知州黃熊兆覈之熊
兆黨伯高言楷當立以州印畀楷楷遂殺煖龍州大亂

州目黃安等潛往田州購寶寶時為奴楊布家十三年
矣安等行百金購得之言之督府都御史林富謂楷勢
已張毋持之急乃令楷攝職俟寶長讓之楷復時時謀
殺寶富諭楷令以印還寶寶謝以五千金益以腴田三
十一村楷計寶弱易與不如邀厚利而徐圖之遂聽命
楷復求韋璋之子應育之令往來寶所寶妻黃氏思明
府土官黃朝女也貳於寶而與應通應乃厚結州目又
數遣人與向武州締好乞兵為衛寶日荒悍刑狡男子

王良為閹楷知良恨寶激使內應良許之楷以千人夜至寶寢門呼良良開門納楷兵執寶寢所斬之以他盜聞應以兵千人據州并結朝自援都御史張經屬副使翁萬達萬達謀之謂楷狙詐未可速圖韋應巽懷寡慮可旦夕禽斷其中堅然後可次第獲督撫善之萬達行部至太平使人以他事召朝諭之計論應當死言楷才勇正須藉為龍州當一面耳時諸言楷事者故不為理州人大譁萬達愈厚楷楷信之遂統精兵千人詣萬達

言狀并以三十一村地獻萬達召楷及州目鄧瑀等入見伏壯士劫之曰汝罪大宜自為計誠死尚可為爾子留一官楷自分無生理乃手書諭其黨曰業已如此亂無益也可善輔我子以存趙萬達即杖楷斃之以楷書諭其州人時楷子匡時生四年矣立之一州悉定乃以十三村還龍州十八村隸崇善縣於是龍州趙氏仍得襲

歸順州舊為峒隸鎮安府永樂間鎮安知府岑志綱分

其第二子岑永綱領峒事傳子瑛屢率兵報効弘治九年總督鄧廷瓚言鎮安府之歸順峒舊為州治洪武初裁革今其峒主岑瑛每効勞於官乞設州治授以土官知州凡出兵令備土兵五千仍歲領土兵二千赴梧州聽調詔從之增設流官吏目一員瑛死子璋襲復從璋奏以本州改隸布政司璋多智畧田州岑猛以不法獲譴都御史姚鏌將舉兵討之璋猛婦翁也鏌慮璋黨猛召都指揮沈希儀謀希儀雅知璋女失寵恨猛又知部

下千戶趙臣雅善璋希儀因使趙臣語璋圖猛璋受命時猛子邦彥守工堯隘璋詐遣兵千人助邦彥言天兵至以姻黨故且與爾同禍今發精兵來幸努力堅守邦彥欣納之璋遣人報希儀曰謹以千人內應矣時田州兵殊死拒戰諸將莫利當隘者希儀獨引兵當之約戰三合歸順兵大呼曰敗矣田州兵驚潰希儀麾兵乘之斬首數千級邦彥死焉猛聞敗欲自經而璋先已築別館使人請猛時猛倉皇不知所出遂挈印從璋使走歸

順璋說為猛草奏促猛出印實封之璋既知猛印所在
乃鳩殺猛斬其首并府印函之間道馳軍門為謾言所
阻竟不論功璋死次子璫襲嘉靖四年提督盛應期以
璫先助猛逆攻泗城許自新出兵討賊自贖從之十四
年田州盧蘇叛糾璫攻鎮安府璫破鎮安并發岑真寶
父母墳墓事聞革冠帶許立功贖璫後從征交趾卒於
軍子代襲萬歷間以貢馬達限給半賞

向武州宋置隸橫山寨元隸田州路其界東北抵田州

西抵鎮安南抵鎮遠洪武二年七月土官黃世鐵遣使
貢馬及方物詔以世鐵為向武州知州許世襲二十一
年廣西布政司言向武州叛蠻梗化時都督楊文佩征
南將軍印討龍州奉議等處復奉命移師向武文調左
副將軍韓觀分兵進討都康向武富勞諸州縣斬世鐵
以兵部尚書唐鐸言置向武州守禦千戶所永樂二年
土官知州黃或遣頭目羅以得貢馬賜鈔幣宣德四年
故土官知州黃謙昌子宗蔭貢馬賜鈔嘉靖四年田州

岑猛叛向武土官以兵助猛提督盛應期議大征檄向武出兵討賊以功贖罪十六年田州盧蘇叛鎮安土官岑真寶以兵納岑邦佐蘇求助於向武時土官黃仲金怨真寶遂與合兵破鎮安事聞革仲金冠帶二十七年以仲金聽調有勞詔許承襲原職免赴京四十二年又以勦平猺寇功加仲金四品服向武領縣一曰富勞元置洪武間為蠻獠所據建文時復置仍隸向武州永樂初省武林入馬土官亦黃氏世襲

奉議州宋置初屬靜江軍後屬廣西經畧安撫司元屬
廣西兩江道宣慰司洪武初土官黃志威舊為田州府
總管來歸附二年詔授其子世鐵為向武州知州世襲
三年志威入朝貢六年招撫奉議等州百十七處人民
皆款服帝嘉志威功命以安州侯州陽縣屬之七年以
志威為奉議州知州兼守禦直隸廣西行省二十六年
奉議州知州黃嗣隆遣人貢馬及方物賜以鈔錠二十
八年廣西布政司言奉議南丹等處蠻人梗化時都督

楊文討龍州伏罪帝命移兵奉議勦賊遣使論文等近
聞奉議兩江溪峒等處林木陰翳蛇虺遺毒草莽中雨
過流毒溪澗飲之令人死師入其地行營駐劄勿飲山
溪水泉恐餘毒傷人宜鑿井以飲爾等其慎察之文發
廣西都司及護衛官軍二萬人調田州泗城等土兵三
萬八千九百人從征師至奉議州蠻寇聞官軍至悉竄
入山林據險自固文督諸將分兵捕之復調叅將劉真
等領兵分道攻南丹叛寇初文等駐師奉議州之東南

分兵追捕賊黨且遣人招降其脅從者賊皆焚廬舍走山谷憑險阻立柵自固文督將士屢攻破之賊衆潰散左副將軍韓觀等遂分兵追討都康向武富勞上林諸州縣破其更吾蓮花大藤峽等寨斬向武土官黃世鐵并其黨萬八千三百餘人招降蠻民復業者六百四十戶徙置象州武山縣蠻寇遂平時兵部尚書致仕唐鐸叅議軍事以朝廷嘗命征勦畢日置衛守之乃會諸將相度形勢置奉議等衛并向武河池懷集武仙賀縣

等處守禦千戶所設官軍鎮守詔從其言宣德二年署
州事土官黃宗允遣頭目貢馬正統五年宗允科斂劫
殺甚且欲戕其母母避之殺母侍者以洩怒為母所告
僉事鄧義奏其事帝敕總兵官柳溥及三司按驗以聞
嘉靖四年田州岑猛叛奉議土官嘗助猛攻泗城州至
是提督盛應期言許其自新令出兵討賊以功贖罪後
土官知州死皆以土判官掌州事論者以奉議彈丸地
三面交迫田州獨南界鎮安其勢甚蹙明初置衛銓官

如宋元故事蓋欲中斷田鎮以伐其謀云

江州界東抵忠州西抵龍州南抵思明北抵太平府其
州宋置隸古萬寨元屬思明路明初土官黃威慶歸附
授世襲知州設流官吏目以佐之直隸布政司嘉靖四
十二年以平徭獍功准江州土官子黃恩暫署本職領
縣一曰羅白洪武初土官梁敬賓歸附授世襲知縣敬
賓死子復昌襲永樂間從征交趾被陷子福里襲

思陵州唐始置宋仍之元屬思明路洪武初省入思明

府二十一年復置思陵州二十七年土官韋延壽貢馬
及方物宣德四年護印土官韋昌來朝貢馬賜鈔幣正
統間貢賜如制其界東至忠州西北至思明南至交趾
瓊州居環海中漢武帝平南粵始置珠崖儋耳二郡歷
晉隋唐宋叛服不一事具前史元改置瓊州路屬海北
海南道宣慰司天歷初改乾寧軍民安撫司洪武元年
征南將軍廖永忠平廣東改立瓊州府以崖州吉陽軍
儋州南寧軍萬州萬安軍俱為州南建州為定安縣隸

馬六年儋州宜倫縣民陳昆六等作亂攻陷州城廣東
指揮使司奏言近儋州山賊亂已調兵勦其儋萬二州
山深地曠宜設兵衛鎮之詔置儋萬二州守禦千戶所
七年儋州黎人符均勝等作亂海南衛指揮張仁率兵
討平之又海南羅屯等洞黎人作亂千戶周旺等討平
之澄邁縣賊王官舍亂典史彭禎領民兵捕斬之十五
年萬崖二州民陳鼎叔等作亂陷陵水縣為海南衛官
軍擊敗追至藤橋斬鼎叔等三百餘人餘黨悉平十七

年儋州宜倫縣黎民唐那虎等亂海南衛指揮張信發
兵討之那虎及其黨鄭銀等敗遁信追禽之送京師知
州魏世吉受賄縱銀去帝謂兵部曰知州不能捕賊及
官軍捕至而反縱之乎命遣力士即其州杖世吉責捕
所縱者永樂三年廣東都司言瓊州所屬七縣八洞生
黎八千五百人崖州抱有等十八村一千餘戶俱已向
化惟羅活諸峒生黎尚未歸附帝命遣通判劉銘齋敕
撫諭之御史汪俊民言瓊州周圍皆海中有大小五指

黎母等山皆生熟黎人所居比歲軍民有逃入黎峒者甚且引誘生黎侵擾居民朝廷屢使招諭黎性頑很未見信從又山水峻惡風氣亦異罹其瘴毒鮮能全活近訪宜倫縣熟黎峒首王賢祐嘗奉命招諭黎民歸化者多請仍詔賢祐量授以官俾招諭未服戒約諸峒無納逋逃其熟黎則令隨產納稅悉免差徭其生黎歸化者免稅三年峒首則量所招民數多寡授以職如此庶幾黎人順服從之遣知縣潘隆本齎敕撫諭四年瓊州屬

縣生黎峒首羅顯許志廣陳忠等三十三人來朝初以
生黎多未向化遣銘招撫至是向化者萬餘戶顯等從
銘來朝且乞以銘撫其衆帝遂授銘瓊州知府專職撫
黎仍授顯等知縣縣丞巡檢等官賜冠帶鈔幣遣還自
是諸黎感悅相繼來歸瓊山臨高諸縣生黎峒首王罰
鍾異王琳等來朝命為主簿巡檢六年銘復率生黎峒
首王賢祐王惠王存禮等來朝貢馬命賢祐為儋州同
知惠存禮為萬安縣主簿八年文昌縣斬脚寨黎首周

振生等來歸賜以鈔幣俾仍往招諸峒九年臨高縣典史王寄扶奉命招至生黎二千餘戶而以峒首王乃等來朝命寄扶為縣主簿并賜王乃等鈔十一年瓊山縣東洋都民周孔洙招諭包黎等村黎人王觀巧等二百三十戶願附籍為民從之臨高民黃茂奉命招撫深峒那呆等二十四峒生黎率黎首王聚符喜等來朝貢馬黎民來歸者戶四百有奇通計前後所撫諸黎共千六百七十處戶三萬有奇蓋皆本廟算云十四年王賢祐

率生黎峒首王撒黎佛金等來朝貢帝嘉納之命禮部
曰黎人遠處海南慕義來歸若朝貢頻繁非存撫意自
今生黎土官峒首俱三年一貢著為令十六年感恩土
知縣樓吉祿率峒首貢馬十九年寧遠土縣丞邢京率
峒首羅淋朝貢時崖州民以私忿相戰鬪衛將利漁所
欲發兵勦之瓊州知府王伯貞執不可曰彼自相仇殺
耳非有寇城邑殺良民之惡不足煩官軍衛將不從伯
貞乃遣寧遠縣丞黃童按視果仇殺逮治數人黎人遂

安宣德元年樂會土主簿王存禮等遣黎首黎寧及萬
州黎民張初等來貢帝謂尚書胡濙曰黎人居海島不
識禮儀叛服不常昔專設官撫綏今來朝當加賚之九
月澄邁縣黎王觀珠瓊山縣黎王觀政等聚衆殺瓊山
土知縣許志廣流劫鄉村殺掠人畜命廣東三司勘實
討之二年指揮王瑀等追捕黎賊兵至金雞嶺賊率衆
拒敵敗之生禽賊首王觀政及從賊二百六十二人斬
首二百六十七級餘衆潰奔走入山招撫復業黎八百

一十二戶以捷聞械送觀政等至京帝謂尚書蹇義曰
蠻性雖難馴然至為變必有激宜嚴戒撫黎諸官寬以
馭之若生事激變國有常刑正統九年崖州守禦千戶
陳政聞黎賊出沒偕副千戶洪瑜領軍搜捕賊乃圍熟
黎村黎首出見政等輒殺之又令軍旗孫得等十五人
焚其廬舍殺其妻孥數人擄其財物各黎激變政及官
軍百人皆為所殺巡按御史趙忠以聞坐瑜激變律斬
景泰三年敕萬州判官王琥曰以爾祖父能招撫黎人

特授土官爾能繼承父志亦既有年茲特降敕付爾撫諭該管村峒黎人各安生業不得做做別峒生黎所為其官軍亦不得擅入村峒擾害激變天順五年敕兩廣巡撫葉盛以海南賊五百餘占據城池可馳至瓊相機撫捕勿使滋蔓弘治二年崖州故土官陳迪孫冠帶舍人陳崇祐朝貢以其能撫黎人之逋逃復業者厚賜之十五年黎賊符南蛇反鎮兵討之不下戶部主事馮顯奏府治在大海南有五指山峒黎人雜居外有三州十

縣一衛十一所永樂間置土官州縣以統之黎民安堵如故成化間黎人作亂三度征討將領貪功殺戮無辜迨弘治間知府張桓余濬貪殘苛斂大失黎心釀成今日南蛇之禍臣本土人頗知事勢乞仍考原設應襲土官子舍使各集土兵可得數萬聽鎮巡官節制有能禽首惡符南蛇者復其祖職以蠻攻蠻不數月可奏績矣詔從之嘉靖十九年總督張經以崖萬二州黎岐叛亂攻逼城邑請設叅將一員駐劄瓊州分守二十八年崖

州賊首邵燕等聚衆四千人為亂詔發兩廣官軍九千
勦之給事鄭廷鵠言瓊州諸黎盤踞山峒而州縣反環
其外其地彼高而我下其土彼膏腴而我鹹鹵其勢彼
聚而我散故自開郡來千六百餘年無歲不遭黎害然
無如今日甚矣今日黎患非九千兵可辦必添調狼土
官兵兼召募打手集數萬衆一鼓而四面攻之然後可
克嘗考勦除黎患其大舉有二元至元辛卯曾空其穴
勒石五指山其時雖建乜田府立定安會同二縣惜其

經畧未盡故所得旋失嘉靖庚子又嘗大渡師徒攻毀
巢崗無處不至於是議者謂德霞地勢平行擬建城立
邑招新民耕守業已舉行中道而廢旋為賊資以至復
有今日謹條三事一崖黎三面郡縣惟東南連郎溫嶺
脚二峒岐賊實當萬州陵水之衝崖賊被攻必借二峒
東江分我兵勢計須先分奇兵攻二峒而以大兵徑擣
崖賊彼此自救不暇莫能相顧則殲滅可期傳聞賊首
那燕已入凡陽構集岐賊此必多方誤我且訛言搖惑

以堅諸部助逆之心宜開示慰安以解狐疑之黨一隋

唐郡縣輿圖可考今多陷入黎中蕩平後悉宜恢復并

以德霞千家羅活等膏腴之地盡還州縣設立屯田且

耕且守仍由羅活磨斬開路以達定安由德霞沿溪水

以達昌化道路四達井邑相望非徒懾奸銷萌而王路

益開拓矣一軍威既振宜建叅將府於德霞各州縣許

以便宜行事以鎮安人心其新附之民中有異志者或

遷之海北地方屯田或編入附近衛所戎籍如漢徙瀾

山蠻故事又擇仁明慈惠之長久任而安輯之則瓊人
受萬世利矣疏下兵部議詔悉允行二十九年總兵官
陳圭總督歐陽必進等督兵進勦斬賊五千三百八十
級俘一千四十九人奪牛羊器械倍之招撫三百七十
六人捷聞帝嘉其功賜圭必進祿米廕襲有差萬歷十
四年長田峒黎出掠兵備道遣兵執戮之草子坡諸黎
召衆來報復戰於長沙營斬黎首百餘級於是黃村田
尾諸峒黎皆出降瓊州黎人居五指山中者為生黎不

與州人交其外為熟黎雜耕州地原姓黎後多姓王及
符熟黎之產半為湖廣福建奸民亡命及南恩藤梧高
化之征夫利其土占居之各稱酋首成化間副使涂棐
設計犁掃漸就編差弘治間符南蛇之亂連郡震驚其
小醜侵突無時而息云

明史卷三百十九

欽定四庫全書

明史卷三百十九

泗城州傳其明年總兵官柳溥奏豹退還利州地 舊

本作正德六年

臣

章宗瀛按正德年中事尚在後

文此條正統六年其事本上下相承傳誤統為德也
上文已有正統元年領起此處不須複說正統謹酌
改

泗城州傳永樂中置長官司

臣

章宗瀛按上林長官

司係永樂七年置不得言初謹據地理志改

利州傳正統初年泗城岑豹侵據利州地

臣章宗瀛

按泗城州傳內載正統二年豹攻利州掠其叔顏妻
子財物此作元年彼此互異謹識

龍州傳唐始置龍州宋仍之

臣章宗瀛按唐始置龍

州隸安南都護府宋仍之改隸邕州太平寨則龍州
乃唐置非宋置也此云宋置誤謹據唐書及方輿紀
要改

龍州傳都御史楊旦討韋璋殺之

臣章宗瀛按楊旦

所討者僅韋璋一人伏誅至岑猛於嘉靖五年為姚
鎮所誅歸順州傳及沈希儀傳通鑑紀事蠻司合志
並同何緣於正德年間旦得誅猛也謹據改

向武州傳左副將軍韓觀

臣章宗瀛按韓觀為左副

將軍其右則都督宋晟也龍州奉議兩傳並作左字
此誤為右謹據明實錄及各傳改

思陵州傳唐始置宋仍之

臣章宗瀛按思陵州係唐

置隸安南都護府此言宋置誤謹據唐書改

思陵州傳唐始置宋仍之儋州南寧軍萬州萬安軍俱
為州南建州為定安縣

臣章宗瀛按崖州為元吉

陽軍所改儋州為元南寧軍所改萬州為元萬安軍
所改傳誤脫南寧軍萬州五字而以萬安軍屬儋州
彼此舛錯定安縣誤作安定據一統志地理志增改
思陵州傳命賢祐為儋州同知惠存禮為萬安縣主簿

臣

章宗瀛按萬安軍所屬有萬寧縣宋末已改萬

寧縣為萬安縣元仍名萬安明正統年裁永樂時猶存今仍舊稱萬寧者誤謹據統志改

思陵州傳瓊州知府王伯貞執不可

臣

章宗瀛按洪

武二年曾以瓊州為州其明年遂改府傳作知州者誤謹據統志地理志改

思陵州傳釀成今日南蛇之禍

臣

章宗瀛按是時叅

議劉信勦南蛇敗績幸伏羌將毛銳率漢達狼土兵十萬出儋州賊大潰斬殺幾盡見蠻司合志謹附考

思陵州傳嘉靖十九年總督張經

臣章宗瀛按張經

傳於嘉靖十六年總督兩廣嗣以平瓊州黎加兵部

尚書傳誤張為蔡

明史卷三百十九考證



總校官編修臣吳紹濬

欽定四庫全書薈要

史部

明史卷三百二十一



詳校官中書臣劉源溥

欽定四庫全書蒼要卷六千九百十三

史部

明史卷三百二十

大學士張廷玉等奉 敕修

傳第二百八

外國一

朝鮮

朝鮮箕子所封國也漢以前曰朝鮮始為燕人衛滿所據漢武帝平之置真番臨屯樂浪元菟四郡漢末有扶

餘人高氏據其地改國號曰高麗又曰高句麗居平壤
即樂浪也已為唐所破東徙後唐時王建代高氏兼併
新羅百濟地徙居東岳曰東京而以平壤為西京其國
北鄰契丹西則女直南曰日本元至元中西京內屬置
東寧路總管府盡慈嶺為界明興王高麗者王顥太祖
即位之元年遣使賜璽書二年送還其國流人顥表賀
貢方物且請封帝遣符璽郎僕斯齋詔及金印誥文封
顥為高麗國王賜厯及錦綺其秋顥遣總部尚書成惟

得千牛衛大將軍金甲兩上表謝并賀天壽節因請祭服制度帝命工部製賜之惟得等辭歸帝從容問王居國何如城郭修乎兵甲利乎宮室壯乎頓首言東海波臣惟知崇信釋氏他未遑也遂以書諭之曰古者王公設險未嘗去兵民以食為天而國必有出政令之所今有人民而無城郭人將何依武備不修則威弛地不耕則民艱于食且有居室無廳事無以示尊嚴此數者朕甚不取夫國之大事在祀與戎苟闕斯二者而徒事佛

求福梁武之事可為明鑑王國北接契丹女直而南接
倭備禦之道王其念之因賜之六經四書通鑑自是貢
獻數至元旦及聖節皆遣使朝賀歲以為常三年正月
命使往祀其國之山川是歲頒科舉詔于高麗顯表謝
貢方物并納元所授金印中書省言高麗貢使多齎私
物入貨宜征稅又多攜中國物出境禁之便俱不許五
年表請遣子弟入太學帝曰入學固美事但涉海遠不
欲者勿強貢使洪師範鄭夢周等一百五十餘人來京

失風溺死者三十九人師範與焉帝憫之遣元樞密使
延安特哩往諭入貢毋數而額復遣其門下贊成事姜
仁裕來貢馬其賀正旦使金湑等已先至帝悉遣還謂
中書省臣曰高麗貢獻繁數既困敝其民而涉海復虞
覆溺宜遵古諸侯之禮三年一聘貢物惟所產毋過侈
其明諭朕意六年額遣甲兩等貢馬五十匹道亡其二
甲兩以聞及進以私馬足之帝惡其不誠却之七年遣
監門護軍周誼鄭庇等來貢表請每歲一貢貢道從陸

由定遼毋涉海其貢物稱送太府監中書省言元時有
太府監本朝未嘗有言涉不誠帝命却其貢是歲顓為
權相李仁人所弑顓無子以寵臣辛旽之子禍為子於
是仁人立禍八年禍遣判宗簿事崔原來告哀且言前
有貢使金義殺朝使蔡斌今嗣王禍已誅義籍其家帝
疑其詐拘原而遣使往祭弔十年使來請故王顓謚號
帝曰顓被弑已久今始請謚將假吾朝命鎮撫其民且
掩其弑逆之跡不可許前所留使者其遣之於是釋原

歸其夏復遣周誼貢馬及方物却不受冬又遣使賀明年正旦帝曰高麗王顓被弑奸臣竊命春秋之義亂臣必誅夫又何言第前後使者皆稱嗣王所遣中書宜遣人往問嗣王如何政令安在若政令如前嗣王不為羈囚則當依前王言歲貢馬千匹明年貢金百斤銀萬兩良馬百細布萬匹仍悉送還所拘遼東民方見王位真而政令行朕無惑已否則弑君之賊必討無赦十一年四月禍復命誼來貢十二年敕遼東守將潘敬葉旺等謹

飭邊備其冬禍遣李茂芳等來貢以不如約却之十三年遼東送高麗使誼至京師帝敕敬等曰高麗弑君又殺朝使前堅請入貢又不如期今遣誼來以虛文飾詐他日必為邊患自今來者其絕勿通因留誼於京師十六年來貢却之命禮部責其朝貢過期陪臣侮慢之罪誠欲聽約者當以前五歲違約不貢之物并至十七年六月禍遣司僕正崔涓禮儀判書金進宜貢馬二千匹且言金非地所產願以馬代輸餘皆如約遼東守將唐

勝宗為之請帝許之然請顯謚號襲王爵未允也十八年正月貢使至帝諭禮臣曰高麗屢請約束朕數不允而其請不已故索歲貢以試其誠偽非以此為富也今既聽命宜損其貢數令三年一朝貢馬五十匹至二十一年正旦乃貢七月禍上表請襲爵并請故王謚命封禍為高麗國王賜故王顯謚恭愍十九年二月遣使貢布萬匹馬千匹九月表賀貢方物其後貢獻輒踰常額且未嘗至三年也冬詔遣指揮僉事高家努以綺布市

馬於高麗二十年三月高家努還陳高麗表辭馬直帝
敕如數償之先是元末遼瀋兵起民避亂轉徙高麗至
是因馬市帝令就索之遂以遼瀋流兵三百餘口來歸
十二月命戶部咨高麗國王嶺北東西之地舊屬開元
者遼東統之鐵嶺之南舊屬高麗者本國統之各正疆
境毋優越二十一年四月禍表言鐵嶺之地實其世守
乞仍舊便帝曰高麗舊以鴨綠江為界今飾辭鐵嶺詐
偽昭然其以朕言諭之俾安分毋生釁端八月高麗千

戶陳景來降言是年四月禍欲寇遼東使都軍相崔瑩
李成桂繕兵西京成桂使陳景屯艾州以糧不繼退師
王怒殺成桂之子成桂還兵攻破王城囚王及瑩景懼
及故降帝敕遼東嚴守備仍遣人偵之十月禍請遜位
於其子昌帝曰前聞其王被囚此必成桂之謀姑俟之
以觀變二十二年權國事昌奏乞入朝帝不許是歲成
桂廢昌而立定昌國院君瑤二十三年正月遣使來告
二十四年三月詔市馬高麗八月權國事瑤進所市馬

千五百匹帝曰三韓君臣悖亂二紀於茲今王瑤嗣立
乃王氏苗裔宜遣使勞之十二月瑤遣其子奭朝賀明
年正旦奭未歸而成桂自立遂有其國瑤出居原州王
氏自五代傳國數百年至是絕二十五年九月高麗知
密直司事趙胖等持國都評議司奏言本國自恭愍王
薨無嗣權臣李仁人以辛旽子禍主國事昏暴好殺至
欲興師犯邊大將李成桂以為不可而回軍禍負罪惶
懼遜位於子昌國人弗順啟請恭愍王妃安氏擇宗親

瑤權國事已及四年昏戾信纔戕害勲舊子夷癡騃不
慧國人謂瑤不足主社稷今以安氏命退瑤於私第王
氏子姓無可當與望者中外人心咸繫成桂臣等與國
人耆老共推主國事惟聖主俞允帝以高麗僻處東隅
非中國所治令禮部移諭果能順天道合人心不啟邊
釁使命往來實爾國之福我又何誅冬成桂聞皇太子
薨遣使表慰并請更國號帝命仍古號曰朝鮮二十六
年二月遣使進馬九千八百餘匹命運紵絲綿布一萬

九千七百餘匹酬之六月表謝貢馬及方物并上前恭
愍王金印請更己名曰旦從之是月遼東都指揮使司
奏朝鮮國招引女直五百餘人潛渡鴨綠江欲入邊乃
遣使敕諭示以禍福旦得敕惶懼陳謝上貢并械送逋
逃軍民三百八十餘人至遼東二十七年旦遣子入貢
二十八年遣使柳珣賀明年正旦帝以表文語慢詰責
之珣言表文乃門下評理鄭道傳所撰遂命逮道傳釋
珣歸二十九年送撰表人鄭總等三人至云表實總等

所撰道傳病不能行帝以總等亂邦構釁留不遣三十
年冬復以表涉譏訕拘其使建文初旦表陳年老以子
芳遠罷位許之成祖立遣官頒即位詔永樂元年正月
芳遠遣使朝貢四月復遣陪臣李貴齡入貢奏芳遠父
有疾需龍腦沉香蘇合香油諸物齎布來市帝命太醫
院賜之還其布芳遠表謝因請冕服書籍帝嘉其能慕
中國禮賜金印誥命冕服九章圭玉珮玉妃珠翠七翟
冠霞帔金墜及經籍綵幣表裏自後貢獻歲輒五六至

焉二年十二月詔立芳遠子禔為世子從其請也五年十二月貢馬二千匹至遼東命戶部運絹布萬五千匹償之六年世子禔來朝賜織金文綺及歸帝親製詩賜之時朝鮮納女後宮立為妃嬪者四人其秋遣陪臣鄭擢來告其父旦之喪命官弔祭賜諡康獻十六年奏世子禔不肖第三子禔孝弟力學國人所屬請立為嗣詔聽王所擇因上表謝并陳己年老謂以禔理國事命光祿少卿韓確鴻臚丞劉泉封禔為朝鮮國王時帝已遷

北都朝鮮益近而事大之禮益恭朝廷亦待以加禮他國不敢望也二十年芳遠卒賜謚恭定二十一年七月禔請立嫡子珣為世子從之先是敕禔貢馬萬匹至是如數至賜白金綺絹宣德二年三月遣中官賜白金紵紗別敕進馬五千匹資邊用九月如數至四年賜禔書珍禽異獸非朕所貴其勿獻後又敕禔金玉之器非爾國所產宜止之土物效誠而已八年禔奏遣子弟詣太學或遼東學帝不許賜五經四書性理通鑑綱目諸書

正統元年三月放朝鮮婦女金黑等五十三人還其國
金黑等自宣德初至京師至是遣中官送回三年八月
賜袍遠游冠絳紗袍玉佩赤舄先是建州長童倉避居
朝鮮界已復還建州朝鮮言昔以窮歸臣臣遇之善今
負恩還建州李滿住所慮其同謀擾邊建州長言所部
為朝鮮追殺阻留一百七十餘家五年詔袍還之七年
五月諭袍曰鴨綠江一帶東寧等衛密邇王境中多細
人逃至王國或被國人誘脅去者無問漢人女直至即

解京初衛拉特密令女直諸部誘朝鮮使背中國徇拒之白其事於朝帝嘉其忠敕獎之并賜綵幣九年春倭寇犯邊徇命將禽獲五十餘人械送京師十年又獲餘黨來獻帝連敕獎諭賜賚加等十三年冬命使調發朝鮮及女直諸部兵會遼東征北敵時英宗北巡邸王即位遣官頒詔於其國景泰元年貢馬五百匹奏稱奉敕辦馬二三萬匹比因鄰敵構釁馬畜踣斃一時未能詔曰敵今少息馬已至者償其直未至者止勿貢是年夏徇

卒賜弔祭謚莊憲封子珣為國王會遼東奏報開原瀋陽有兵入境掠人畜係建州海西諸部女直頭目李滿住等為嚮導因諭珣相為犄角截殺之其秋續貢馬千五百餘匹賜冕服并償其直冬又賜珣及妃權氏誥命封其子弘暉為世子二年冬以建州頭目潛與朝鮮通戒珣絕其使三年秋珣卒來告哀遣中官往弔祭賜謚恭順命子弘暉嗣立弘暉立三年以年幼且嬰宿疾請以叔瑀權國事七年上表遜位乃封瑀為國王瑀請立

子璋為世子從之天順三年邊將奏有建州三衛都督
私與朝鮮結恐為中國患因敕瑀毋作不靖貽後悔瑀
疏辨復諭曰宣德正統年間以王國與彼互相侵掠敕
解怨息兵初不令交通給賞授官也彼既受朝廷官職
王又加之是與朝廷抗也王素秉禮義何爾文過飾非
後宜絕私交以全令譽四年復諭瑀曰王奏毛憐衛都
督朗布爾汗通謀煽亂已置之法夫法止可行於國中
豈得加于鄰境朗布爾汗有罪宜奏朝廷區處今輒行

殺害何怪其子阿必齊之思復讐也聞阿必齊之母尚在宜急送遼東都司令阿必齊領回以解讐怨五年建州衛諸部至義州殺掠琿奏乞朝命還所掠兵部議朝鮮先嘗誘殺朗布爾汗繼又誘致都指揮烏格縱兵掠其家屬今諸部實係復讐宜諭朝鮮寇盜之來皆自取惟守分安法庶弭邊釁從之成化元年冬陪臣李門炯來朝卒於道命給棺賜祭并賜綵幣慰其家時朝鮮頻貢異物三年春敕諭琿修常貢勿事珍奇是時朝廷用

兵征建州敕琮助兵進勦琮遣中樞府知事康純統衆
萬餘渡鴨綠潑豬二江攻破九獮府諸寨斬獲多四年
正月遣官來獻俘詔從厚賚敕獎諭之是年琮卒賜謚
惠莊遣太監鄭同崔安封世子眈為王給妃韓氏誥命
既行巡按遼東御史侯英奏曰遼東連年被兵瘡痍未
起今復禾稼不登軍民乏食太監鄭同等隨從人員所
過驛騷臣考先年曾於翰林院中選有學行文望者出
使今同安俱朝鮮人墳墓宗族皆在見其國王不免屈

節殊褻中國體乞寢成命或翰林或給事中及行人內
推選一員往使為便帝曰英所言良是自後賞賚遣內
臣其冊封正副使選廷臣有學行者六年晁病篤以所
生子幼命其兄故世子暉之子婁權國事遣陪臣以聞
及卒賜謚襄悼命婁嗣位婁妻韓氏封王妃十年追贈
婁父世子暉為國王謚懷簡母韓氏為王妃從所請也
十一年四月婁奏建州諸部糾聚毛憐等衛縱橫邊境
不已乞朝命戒飭十二年十月婁為繼妻尹氏請封賜

詔命冠服時禁外國互市兵器婁奏小邦北連女直南
鄰倭島五兵之用不可缺一而弓材所需牛角仰于上
國高皇帝時嘗賜火藥火礮今望特許收買弓角不與
外番同禁兵部議歲市弓角五十後以不足於用請無
限額詔許倍市十五年十月命婁出兵夾擊建州女直
婁遂遣右贊成魚有沼率兵至滿浦江以冰泮後期復
遣左議政尹弼商節度使金嶠等渡江進剿十六年春
遣陪臣來獻捷帝命內官齎敕獎其能繼先烈賜金幣

領兵官賞賚如例後使還遣其臣許熙伴送熙歸至開
建州騎二千邀之掠其從卒三十餘人馬二百三十
餘匹他所亡物稱是奏聞英國公張懋吏部尚書尹旻
等以遼東連年用兵未可輕動宜以此意諭婺敕遼東
守臣整飭邊備更令譯者窮究所掠期在必得仍賜熙
白金綵幣慰安之十七年婺奏繼妃尹氏失德廢置乞
更封副室尹氏從之十九年四月封婺長子懽為世子
弘治七年十二月婺卒賜謚康靖明年四月封懽為國

王妻慎氏為王妃十二年惺奏本國人屢有違禁匿海
島誘引軍民漸至滋蔓乞許本國自行搜刷其係上國
地方請敕官追捕時遼東守臣亦奏如惺言報可十五
年冬封惺長子顥為世子正德二年惺以世子顥夭亡
哀慟成疾奏請以國事付其弟懌其國人復奏請封懌
禮部議命懌權理國事俟惺卒乃封既陪臣盧公弼等
以朝貢至京復請封懌廷議不允十二月惺母妃奏懌
長且賢堪付重寄於是禮部奏惺以痼疾辭位懌以親

弟承托授受既明友愛不失通國臣民舉無異詞宜順其請上乃允懌嗣位遣中官敕封并賜其妃尹氏誥命初成桂之自立也與宰相李仁人本異族永樂間降祭海嶽祝文稱成桂為仁人子而祖訓亦載仁人子成桂更名旦後成桂子芳遠奏辨太宗許令改正至是修大明會典仍列祖訓于朝鮮國貢使市以歸懌上疏備陳世系辨先世無弑逆事乞改正禮部議會典詳載本朝制度事涉外國疑似之際在所略況成桂得國出皇祖

命其不繫仁人後太宗詔可徵宜從其請詔曰可十五年冬命內官封懌子皓為世子賜懌金帛珠玉令括取異物及童男女以進十六年世宗即位禮官言天子初踐阼宜正中國之體絕外裔狎侮之端請諭懌非朝廷意召內臣還毋有所索取帝從之嘉靖二年八月以俘獲倭夷來獻并送還中國被掠八人賜白金錦紵八年八月陪臣柳溥上言國祖李旦係本國全州人二十八世祖瀚仕新羅為司空新羅亡六世孫兢休入高麗十

三世孫安社仕元為南京千戶所達嚕噶齊元季兵興
安曾孫子春與男成桂避地東遷至正辛丑當恭愍王
之十年有紅巾賊入境成桂擊賊有功授武班職事時
尚未知名恭愍無嗣陰蓄寵臣辛旽之子禍為子晚為
嬖臣洪倫內豎崔萬生所弑權臣李仁人誅倫萬生而
立禡擢成桂為門下侍中禍遣成桂侵遼東成桂不從
返兵禍懼遜位于子昌昌以偽姓見黜復立王氏裔定
昌君瑤竄仁人於外瑤復不道國人戴成桂請於高皇

帝立為王更名旦瞻瑤別邸終其身實未嘗為弑前永樂正德間屢經奏請俱蒙俞允而迄未改正今遇重修會典乞賜昭雪詔送史館編纂十八年二月睿宗祔太廟配享明堂禮成懌表賀帝特御奉天門引見賜宴禮部二十三年冬懌卒二十四年正月來訃賜謚恭僖詔立其子皓皓未逾年卒賜謚榮靖九月皓弟權國事恒遣使謝祭謚并請罷封詔許之二十五年恒遣使送下海番人六百餘至邊賜金幣二十六年正月恒咨稱福

建人從無泛海至本國者因往日本市易為風所漂前
後共獲千人以上皆挾軍器貨物致中國火礮交為倭
有恐起兵端詔頃年沿海奸民犯禁福建尤甚往往為
外國所獲有傷國體海道官員令巡按御史察參仍賜
王銀幣以旌其忠三十一年冬以洪武永樂間所賜樂
器敝壞奏求律管更乞遣樂官赴京校習許之三十五
年五月有倭船四自浙直敗還漂入朝鮮境垣遣兵擊
殲之得中國被俘及助逆者三十餘人來獻因賀冬至

節帝賜璽書褒諭三十八年十一月奏今年五月有倭寇駕船二十五隻來抵海岸臣命將李鐸等勦殺殆盡獲中國民陳春等三百餘人內招通倭嚮導陳得等十六人俱獻闕下復降敕獎勵厚賚銀幣并賜鐸等有差四十二年九月岷復上書辨先世非李仁人後今修會典雖蒙釐正乞著始祖旦父子春之名帝令附錄會典隆慶元年六月遣官頒即位詔時帝將幸太學來使乞留觀禮許之是年冬岷卒賜謚恭憲命其姪肅襲封萬

歷元年正月上穆宗尊謚兩宮徽號禮成肅表賀獻方
物馬匹時肅屢請賜皇明會典為其先康獻王旦雪冤
十六年正月會典成適貢使愈泓在京請給前書以終
前命許之十七年十一月陪臣奇岑等入賀冬至奏稱
本年六月大琉球國船遭風至海岸所有男婦合解京
給文放歸從之十九年十一月奏倭酋關白平秀吉聲
言明年三月來犯詔兵部申飭海防平秀吉者薩摩州
人初隨倭關白信長會信長為其下所弑秀吉遂統信

長兵自號闕白刼降六十餘州朝鮮與日本對馬島相望時有倭夷往來互市二十年夏五月秀吉遂分渠帥行長清正等率舟師逼釜山鎮潛渡臨津時朝鮮承平久兵不習戰恥又酒酒弛備猝島夷作難望風皆潰恥棄王城令次子琿攝國事奔平壤已復走義州願內屬七月兵部議令駐劄險要以待天兵號召通國勤王以圖恢復而是時倭已入王京毀墳墓刼王子陪臣剽府庫八道幾盡沒旦暮且渡鴨綠江請援之使絡繹於道

廷議以朝鮮為國藩籬在所必爭遣行人薛潘諭肱以興復大義揚言大兵十萬且至而倭業抵平壤朝鮮君臣益急出避愛州遊擊史儒等帥師至平壤戰死副總兵祖承訓統兵渡鴨綠江援之僅以身免中朝震動以宋應昌為經略八月倭入豐德等郡兵部尚書石星計無所出議遣人偵探之于是嘉興人沈惟敬應募惟敬者市中無賴也是時秀吉次對馬島分其將行長等守要害為聲援惟敬至平壤執禮甚卑行長給曰天朝幸

按兵不動我不久當還以大同江為界平壤以西盡屬
朝鮮耳惟敬以聞廷議倭詐未可信乃趣應昌等進兵
而星頗惑于惟敬乃題署遊擊赴軍前且請金行間十
二月以李如松為東征提督明年正月如松督諸將進
戰大捷於平壤行長渡大同江遁還龍山所失黃海平
安京畿江源四道竝復清正亦遁還王京如松既勝輕
騎趨碧蹄館敗退駐開城事具如松傳初如松誓師欲
斬惟敬以參軍李應試言而止至是敗氣縮而應昌急

圖成功倭亦乏食有歸志因而封貢之議起應昌得倭報惟敬書乃令遊擊周弘謨同惟敬往諭倭獻王京返王子如約縱歸倭果於四月棄王城遁時漢江以南千有餘里朝鮮故土復定兵部言宜令王還國居守我各鎮兵久疲海外以次撤歸為便詔可應昌疏稱釜山雖瀕海南猶朝鮮境有如倭覘我罷兵突入再犯朝鮮不支前功盡棄今撥兵協守為第一策即議徹宜少需俟倭盡歸量留防戍部議留江浙兵五千分屯要害仍諭

肱蒐練軍實毋恃外援已而沈惟敬歸自釜山同倭使
來請款而倭隨犯咸安晉州逼全羅聲復漢江以南以
王京漢江為界如松計全羅饒沃南原府尤其咽喉乃
命諸將分守要害已倭果分犯我師竝有斬獲兵科給
事中張輔之遼東都御史趙燿皆言款貢不可輕受七
月倭從釜山移西生浦送回王子陪臣時師久暴露聞
撤勢難久羈應昌請留劉綎川兵吳惟忠駱尚志等南
兵合薊遼兵共萬六千聽綎分布慶尚之大邱月餉五

萬兩資之戶兵二部先是發帑給軍費已累百萬廷臣
言虛內實外非長策請以所留川兵命綏訓練兵餉令
本國自辦于是詔撤惟忠等兵止留綏兵防守諭朝鮮
世子臨海君瑋居全慶以顧養謙為經畧九月昞以三
都既復疆域再造上表謝恩然時倭猶據釜山也星益
一意主款九月兵部主事曾偉芳言關白大衆已還行
長留待知我兵未撤不敢以一矢加遺欲歸報關白捲
土重來則風不利正苦冬寒故款亦去不款亦去沈惟

敬前於倭營講購咸安晉州隨陷而欲恃款冀來年不
攻則速之款者正速之來耳故款亦來不款亦來宜令
朝鮮自為守弔死問孤練兵積粟以圖自強帝以為然
因敕諭肅者甚至二十二年正月肅遣金晬等進方物
謝恩禮部郎中何喬遠奏晬涕泣言倭寇猖獗朝鮮束
手受刃者六萬餘人倭語悖慢無禮沈惟敬與倭交通
不云和親輒曰乞降臣謹將萬厯十九年中國被掠人
許儀所寄內地書倭夷荅劉綎書及厯年入寇處置之

宜乞特敕急止封貢詔兵部議時廷臣交章皆以罷封
貢議戰守為言八月養謙奏講貢之說貢道宜從寧波
關白宜封為日本王諭行長部倭盡歸與封貢如約九
月肱請許保國帝乃切責羣臣阻撓迨褫御史郭實等
詔小西飛入朝集多官面議要以三事一勒倭盡歸巢
一既封不與貢一誓無犯朝鮮倭俱聽從以聞帝復諭
於左闕語加周複十二月封議定命臨淮侯李宗城充
正使以都指揮楊方亨副之同沈惟敬往日本王給金

印行長授都督僉事二十三年九月昞奏立次子琿為嗣先是昞庶長子臨海君琿陷賊中驚憂成疾次子光海君琿收集流散頗著功績奏請立之禮部尚書范謙言繼統大義長幼定分不宜僭差遂不許至是復奏引永樂間恭定王例上請禮臣執奏不從二十四年五月昞復疏請立琿禮部仍執不可詔如議時國儲未建中外恟疑故尚書范謙於朝鮮易封事三疏力持云九月封使至日本先是沈惟敬抵釜山私奉秀吉蟒玉翼善

冠地圖武經良馬而李宗城以貪淫為倭守臣所逐棄
璽書夜遁事聞逮問乃以方亨充正使加惟敬神機營
銜副之及是奉冊至關白怒朝鮮王子不來謝止遣二
使奉白土綢為賀拒其使不見語惟敬曰若不思二子
三大臣三都八道悉遵天朝約付還今以卑官微物來
賀辱小邦邪辱天朝邪且留石曼子兵於彼候天朝處
分然後撤還翼日奉貢遣使賫表文二道隨冊使渡海
至朝鮮廷議遣使於朝鮮取表文進驗其一謝恩其一

乞天子處分朝鮮初方亨詭報去年從釜山渡海倭於大版受封即回和泉州然倭方責備朝鮮仍留兵釜山如故謝表後時不發方亨徒手歸至是惟敬始投表文案驗潦草前折用豐臣圖書不奉正朔無人臣禮而寬甸副總兵馬棟報清正擁二百艘屯機張營方亨始直吐本末委罪惟敬并呈石星前後手書帝大怒命逮石星沈惟敬案問以兵部尚書邢玠總督薊遼改麻貴為備倭大將軍經理朝鮮僉都御史楊鎬駐天津申警備

楊汝南丁應泰贊畫軍前五月玠至遼行長建樓清正
布種島倭害水索朝鮮地圖玠遂決意用兵麻貴望鴨
綠江東發所統兵僅萬七千人請濟師玠以朝鮮兵惟
嫺水戰乃疏請募兵川浙并調薊遼宣大山陝兵及福
建吳淞水師劉綎督川漢兵聽勦貴密報候宣大兵至
乘倭未備掩釜山則行長禽清正走玠以為奇計乃檄
楊元屯南原吳惟忠屯忠州六月倭數千艘泊釜山戮
朝鮮郡守安弘國漸逼梁山熊川惟敬率營兵二百出

入釜山玠陽為慰藉檄楊元襲執之縛至貴營惟敬執而嚮導始絕七月倭奪梁山三浪遂入慶州侵閑山統制元均兵潰遂失閑山閑山島在朝鮮西海口右障南原為全羅外藩一失守則沿海無備天津登萊皆可揚帆而至而我水兵三千甫抵旅順閑山破經畧檄守王京西之漢江大同江扼倭西下無防運道八月清正圍南原乘夜猝攻守將楊元遁時全州有陳愚衷去南原僅百里南原告急愚衷不敢救聞已破棄城走麻貴遣

遊擊牛伯英赴援與愚衷合兵屯公州倭遂犯全慶逼王京王京為朝鮮八道之中東阻烏嶺忠州西則南原全州道相通自二城失東西皆倭我兵單弱因退守王京依險漢江麻貴請於玠欲棄王京退守鴨綠江海防使蕭應宮以為不可自平壤無程趨王京止之麻貴發兵守稷山朝鮮亦調都體察使李元翼由烏嶺出忠清道遮賊鋒玠既身赴王京人心始定玠召參軍李應試問計應試請問廟廷主畫云何玠曰陽戰陰和陽勦陰

撫政府八字密畫無泄也應試曰然則易耳倭叛以處
分絕望其不敢殺楊元猶望處分也直使人諭之曰沈
惟敬不死則退矣因請使李大諫於行長馮仲纓於清
正玠從之九月倭至漢江楊鎬遣張貞明持惟敬手書
往責其動兵有乖靜候處分之實行長正成亦尤清正
輕舉乃退屯井邑麻貴遂報青山稷山大捷蕭應宮揭
言倭以惟敬手書而退青山稷山并未接戰何得言功
玠鎬怒遂勅應宮懼不親解惟敬竝逮十一月玠徵

兵大集帝發帑金犒軍賜玠尚方劍而以御史陳效監其軍玠大會諸將分三協鎬同貴率左右協自忠州烏嶺向東安趨慶州專攻清正使李大諫通行長約勿往援復遣中協屯宜城東援慶州西扼全羅以餘兵會朝鮮合營詐攻順天等處以牽制行長東援十二月會慶州麻貴遣黃應賜賄清正約和而率大兵奄至其營時倭屯尉山城依山險中一江通釜寨其陸路由彥陽通釜山貴欲專攻尉山恐釜倭由彥陽來援乃多張疑兵

又遣將遏其水路遂進逼倭壘遊擊擺寨以輕騎誘倭
入伏斬級四百餘獲其勇將乘勝拔兩柵倭焚死者無
算遂奔島山連築三寨翼日遊擊茅國器統浙兵先登
連破之斬獲甚多倭堅壁不出島山視尉山高石城堅
甚我師仰攻多損傷諸將乃議曰倭艱水道餉難繼第
坐困之清正可不戰縛也鎬等以為然分兵圍十日夜
倭饑甚偽約降緩攻俄行長援兵大至將繞出軍後鎬
不及下令策馬西奔諸軍皆潰遂撤兵還王京士卒物

故者二萬上聞之震怒乃罷鎬聽勘以天津巡撫萬世德代事詳鎬傳二十六年正月邢玠以前役乏水兵無功乃益募江南水兵議海運為持久計二月都督陳璘以廣兵劉綎以川兵鄧子龍以浙直兵先後至玠分兵三協為水陸四路路置大將中路如梅東路貴西路綎水路璘各守汛地相機行勦時倭亦分三窟東路則清正據尉山西路則行長據粟林曳橋建砦數重中路則石曼子據泗州而行長水師番休濟餉往來如駛我師

約日竝進尋報遼陽警李如松敗沒詔如梅還赴之中
路以董一元代當應泰之劾鎬也肅請回乾斷崇勵鎮
撫以畢征討上不許又應曾以築城之議為鎬罪案謂
堅城得志啟朝鮮異日之患於是肅奏辨帝曰連年用
兵發餉以爾國素効忠順故也毋以人言自疑九月將
士分道進兵劉綎進逼行長營約行長為好會翼日攻
城斬首九十二陳璘舟師協堵擊毀倭船百餘行長潛
出千餘騎扼之綎不利退璘亦棄舟走麻貴至尉山頗

有斬獲倭偽退誘之貴入空壘伏兵起遂敗董一元進
取晉州乘勝渡江連燬二寨倭退保泗州老營鏖戰下
之前逼新寨寨三面臨江一面通陸引海為濠海艘泊
寨下千計築金海固城為左右翼十月董一元遣將四
面攻城用火器擊碎寨門兵競前拔柵忽營中火藥崩
煙燄漲天倭乘勢衝擊固城倭亦至兵遂大潰奔還晉
州帝聞命斬二遊擊以徇一元等各帶罪立功是月福
建都御史金學曾報七月九日平秀吉死各倭俱有歸

志十一月清正發舟先走麻貴遂入島山西浦劉綎攻奪曳橋石曼子引舟師救行長陳璘邀擊敗之諸倭揚帆盡歸自倭亂朝鮮七載喪師數十萬糜餉數百萬中朝與屬國迄無勝算至關白死而禍始息二十七年四月以平倭詔告天下又敕諭肅曰倭奴平秀吉肆為不道蹂躪爾邦朕念王世篤忠貞深用憫惻七年之中日以此賊為事始行薄伐繼示包容終以嚴討蓋不殺乃天之心而用兵非予得已安疆靖亂宜取蕩平神惡凶

盈陰殲魁首大師乘之追奔逐北鯨鯢盡戮海隅載清
捷書來聞憂勞始釋惟王雖還舊物實同新造振凋起
敝為力倍艱倭雖遁歸族類尚在茲命邢玠振旅歸京
量留萬世德等分布戍守王宜卧薪嘗膽無忘前恥惟
忠惟孝繼紹前休五月玠條陳東征善後事宜十事一
留戍兵馬步水陸共計三萬四千有奇馬三千匹一定
月餉每年計銀九十一萬八千有奇一定本色合用米
豆分派遼東天津山東等處每年十三萬石一留中都

海防道一裁餉司一重將領一添巡捕一分汎地一議
操練一責成本國廷臣議數年疲耗今始息肩自宜內
固根本不當更為繁費況彼國兵荒之後不獨苦倭之
擾無苦我兵故今日善後事宜仍當商之彼國先量彼
餉之贏絀始可酌我兵之去留至於增買馬匹添補標
兵創立巡捕以至管餉府佐悉宜停止帝命督撫會同
國王酌奏八月肅獻方物助大工褒賞如例十月請留
水兵八千以資戍守其撤回官兵駐劄遼陽備警二十

八年四月請將義州等倉遺下米豆運回遼陽戶部議
輸運維艱莫若徑與彼國振其彫敝以昭皇仁詔曰可
二十九年二月兵部覆奏經督條陳七事一練兵士麗
人驚悍耐寒苦而長衫大袖訓練無方宜以束伍之法
教之一守衝要朝鮮三面距海釜山與對馬相望巨濟
次之宜各守以重兵并尉山開山等處皆宜戍守一修
險隘王京北倚叢山南環滄海忠州左右烏竹二嶺羊
腸繞曲有一夫當關之險今營壘遺址尚存亟宜修葺

一建城池朝鮮八道十九無城平壤西北鴨渚二江俱
南通海倘倭別遣一旅占據平壤則王京聲援斷絕皆
應修築屯聚一造器械倭便戰陸不便海以船制重大
不利攻擊今准福曄造百十艘為奇兵并添造神機百
子大箭一訪異材朝鮮貴世官賤世役一切禁錮往往
走倭走敵為本國患宜破格搜採一修內治國家東南
臨海以登旅為門戶鎮江為咽喉應援之兵不宜盡撤
我自固亦所以固朝鮮也詔朝鮮刻勵以行九月奏所

頒誥命冕服遭變淪失祈補給從之時倭國內亂對馬
島主平義智悉遣降人還朝鮮遺書乞和且揚言秀吉
將家康將輸糧數十萬石為軍興資以脅朝鮮朝鮮與
對馬島一水相望島地不產五穀資米於朝鮮兵興後
絕開市因百計脅款秀吉死我軍盡撤朝鮮畏倭滋甚
欲與倭通款又懼開罪中國十二月昫以島倭求款來
請命兵部以事難遙度令總督世德酌議詔可三十年
十一月昫言倭使頻來要挾和款兵端漸露乞選將率

兵督同本國訓練修防帝曰曾留將士教習成法具在
無容再遣因命其使臣齎敕誠勵三十三年九月昖復
請封琿為世子禮部仍執立長之議三十五年四月昖
以家康求和來告兵部議聽王自計而已由是和款不
絕後三年始畫開市之事三十六年昖卒光海君琿自
稱署國事遣陪臣來訃且請謚帝惡其擅不允令諛國
臣民公議以聞時我

大清兵征服各部漸近朝鮮兵部議令諛王大修武備

整飭邊防并請敕遼左督撫鎮臣遣官宣達毋相侵犯之意從之十月封琿為國王從其臣民請也三十七年二月謚肅曰昭敬遣官賜琿及妃柳氏誥命初朝鮮失守賴中國力得復倭棄釜山遁然陰謀啟疆為患不已於是海上流言倭圖釜山朝鮮與之通四十一年九月總兵官楊宗業以聞琿疏辨詔慰解之四十二年四月奏請追封生母金氏禮部按會典嫡母受封而生母先亡者得追贈乃命封為國王次妃四十三年十一月表

賀冬至因奏買回吾學編弇山堂別集等書載本國事
與會典乖錯乞改正禮部言野史不足憑今所請恥與
逆黨同譏宜憫其誠宣付史館報可初琿為生母已得
封至是復祈給冠服禮臣以金氏側室禮有隆殺執不
可四十五年正月琿請至再帝以琿屢次懇陳勉從之
四十七年楊鎬督馬林杜松劉綎等出師為我

大清兵所敗朝鮮助戰兵將或降或戰死琿告急詔加
優恤十一月兵部覆朝鮮入貢之道宜添兵防守詔鎮

江等處設兵將令經畧熊廷弼調委四十八年正月琿
奏敵兵八月中攻破北關錦台什自焚巴揚古出降鐵
嶺之後蒙古宰桑亦為所滅聞其國謀議以朝鮮北關
宰桑皆助兵南朝今北關宰桑皆滅不可使朝鮮獨存
又聞設兵牛毛寨萬遮嶺欲畧寬甸鎮江等處寬甸鎮
江與昌城義州諸堡隔水相望孤危非常敵若從靉陽
境上鴉鶻關取路遶出鳳凰城裏一日長驅寬鎮昌城
俱莫自保內而遼左八站外而東江一城彼此隔斷聲

援阻絕可為寒心望速調大兵共為犄角以固邊防時
遼鎮塘報稱朝鮮與

大清講和朝議遂謂琿陽衡陰順宜遣官宣諭或命將
監護其說紛拏琿疏辨二百年忠誠事大死生一節詞
極剴摯禮兵二部請降敕令曉諭以安其心帝是其議
然敕令陪臣往不遣官也天啟元年八月改朝鮮貢道
自海至登州直達京師時毛文龍以總兵鎮皮島招集
逃民為兵而仰給於朝鮮十一月琿奏力難餽餉乞循

萬厯東征例發運山東粟從之三年四月國人廢琿而立其姪綾陽君倭以昭敬王妃之命權國事令議政府移文督撫轉奏文龍為之揭報登州巡撫袁可立上言琿果不道宜聽太妃具奏以待中國更立疏留中八月王妃金氏疏請封倭禮部尚書林堯俞言朝鮮廢立之事內外諸臣抒忠發憤有謂宜聲罪致討者有謂勿遽討且受方貢覲顙末者或謂當責以大義察輿情之向背者或謂當令倭討敵自洗者衆論咸有可采其謂琿

實悖德宗討叛臣以赤心奉朝廷者惟文龍一人耳皇上奉天討逆扶植經常此正法也母亦念彼素稱恭順迥異諸裔則更遣貞士信臣會同文龍公集臣民再四詢訪勘辨既明再請聖斷報可十二月禮部復上言臣前同兵部移咨登撫并劄毛帥遣官往勘今據申送彼國公結十二道自宗室至八道臣民共稱宗為恭順且彼之陪臣相率哀籲謂當此危急之秋必先君國之主乞先頒敕諭令宗統理國事仍令發兵索賦同文龍設

伏出奇侯漸有次第始遣重臣往正封典庶幾字小之中不失固圉之道從之四年四月封侗為國王五年十二月文龍報朝鮮逆黨李适韓明璉等起兵昌城直趨王京被臣禽獲餘孽韓潤鄭梅等竄入建州有左議府尹義立約為內應期今冬大舉攻朝鮮臣已咨國王防守暫移鐵山之衆就雲從島柴薪登萊巡撫武之望奏毛帥自五月以來營室於須彌所謂雲從島是也今十月又徙兵民商賈以實之而鐵山之地空矣故朝鮮各

道疑其有逼處之嫌甚至布兵以防禦之今鎮臣所稱李适等之叛尹義立之內應臣等微聞之而未敢遽信焉信之則益重鮮人之疑不信則恐貽後來之患兵部言牽制敵國者朝鮮也聯屬朝鮮者毛鎮也駕馭毛鎮者登撫也今撫臣與鎮臣不和以至鎮臣與屬國不利帝乃飭勉鎮撫同心而韓潤尹義立等令朝鮮自處倥又請撤遼民安插中土兵部言遼人去留文龍是視文龍一日不去則遼人一日不離鮮人驅之入島

可也驅之離島不可也宜令鎮臣將遼民盡刷過島登
撫刺期運糧朝鮮量行救振以資屯牧帝是之六年十
月倂上疏曰皇朝之於小邦覆幬之恩視同服內頃遭
昏亂潛通敵國皇天震怒降黜厥命臣自權署之初不
敢遑寧即命陪臣張晚為帥李适副之付以國中精銳
進屯寧邊一聽毛鎮節制以候協勦之期而适重兵在
握潛蓄覬覦遂與龜城府使明璉舉兵內叛直犯京城
晚收餘兵躡其後與京輔官兵表裏夾攻賊皆授首而

西邊軍實及列鎮儲侍罄於是役矣毛鎮當全遼淪沒
之後孤軍東渡寄寓海上招集遼民前後數十萬亦小
邦所仰藉也顧以封疆多故土瘠民貧內供本國之軍
需外濟鎮兵之待哺生穀有限支給實難遼民迫於饑
餒散布村落強者攫奪弱者丐乞小邦兵民被撓不堪
拋棄鄉邑轉徙內地遼民逐食亦隨而入自昌義以南
安肅以北客居六七主居三四向者將此情形具奏見
兵部題覆處分已定何敢再干至韓潤及弟潭係逆賊

明璉子姪亡命潛逃因而勾引來寇賊既叛國而去制
命已不在臣尹義立曾任判書本非議政頃年差為毛
鎮接伴官不稱任使褫職歸家竝無怨叛之事毛鎮據
王仲保等所訴都無實事意必有纔邪之臣欺妄督撫
以售其交構之計者毛帥久鎮海外臣與周旋已近十
稔雖餽牽將竭彼此俱困而情誼之殷實無少損且其
須彌之遷直為保護累重將以就便芻薪一進一退兵
家常事訛言噂沓本不介意竊見部撫移咨曰虞其逼

操練一責成本國帥甚至有布兵以防屬國攜貳之語似海外情事未曾諒悉臣之請刷遼兵因力不足濟初非慮及逼處也臣方與毛鎮同心一力建功報主豈敢有一毫猜防意乎帝報曰王和協東鎮愛戴中朝忠貞之忱溢乎言表鎮軍久懸鮮遼雜處久客累主生寡食多微王言朕有不坐照萬里之外者然毛帥在中朝為牽制之師在王國則脣齒之形也海上芻輓已令諛部區畫刻期運濟逃難邊民亦令毛帥悉心計處俾無重

為王累傳訛之言未足介懷并力一心王其勉之七年
三月兵部上文龍揭言麗官麗人招敵攻鐵山傷我兵
千人殺麗兵六萬焚糧百餘萬敵遂移兵攻麗矣帝敕
文龍速相機應援登撫李嵩奏朝鮮叛臣韓潤等引敵
入安州節度使南以興自焚死中國援兵都司王三桂
等俱陣亡既復奏義州及郭山凌漢山城俱破平壤黃
州不戰自潰敵兵直抵中和遊騎出入黃鳳之間又分
向雲從攻掠毛帥國王及士民遷於江華以避難時

大清兵所至輒下朝鮮列城望風奔潰乃遣使諭倭
輸款遂班師九月倭奏被兵情形時熹宗崩莊烈帝嗣
位優詔勵勉焉崇禎二年改每歲兩貢為一貢先是遼
路阻絕貢使取道登萊已十餘年矣自袁崇煥督師題
改覺華迂途冒險其國屢請復故至是遣戶曹判書鄭
斗源從登海來移書登撫孫元化屬其陳請元化委官
伴送仍疏聞帝以水路既有成命改途嫌于自便不許
是年六月督師袁崇煥殺平遼將軍左都督毛文龍於

雙島六年六月倭遺書總兵黃龍言文龍舊將孔有德耿仲明率士卒二萬投順

大清向朝鮮徵糧本國以有德等曩在皮島為本國患故未之應龍以聞十年正月

太宗文皇帝親征朝鮮責其渝盟助明之罪列城悉潰朝鮮告急命總兵陳洪範調各鎮舟師赴援三月洪範奏官兵出海越數日山東巡撫顏繼祖奏屬國失守江華已破世子被禽國王出降今大治舟艦來攻皮島鐵山

其鋒甚銳宜急救沈世魁陳洪範二鎮臣以堅守皮島
為第一義帝以繼祖不能協圖匡救切責之亡何皮島
竝為

大清兵所破朝鮮遂絕不數載而明亦亡矣朝鮮在明
雖稱屬國而無異域內故朝貢絡繹錫賚便蕃殆不勝
書止著其有關治亂者於篇至國之風土物產則具載
前史茲不復錄

明史卷三百二十

欽定四庫全書

明史卷三百二十

朝鮮傳已為唐所破東徙

臣

方煒按唐書高麗傳高

宗總章元年拔平壤城擒高藏男建等獻俘於含元

宮分其地置都督府傳云為唐所破蓋本此謹識

朝鮮傳漢末有扶餘人高氏據其地改國號曰高麗

臣

方煒按朱國禎朝鮮記戰國時屬燕秦屬遼東築

長城自此起漢末公孫度開府行牧事于遼東并有

據稱高麗所載較詳謹附識

朝鮮傳元至元中西京內屬

臣

方煒按金大定時高

麗臣趙位寵曾以慈悲嶺鴨綠江四十餘城內附世宗惡其叛逆不許見金本紀及續通鑑傳未載謹附識

朝鮮傳三年正月命使往祀其國之山川

臣

方煒按

是時奉使者為禮臣徐師旻至五月乃至其國事詳

朝鮮記謹附考

朝鮮傳十一年四月禍復命誼來貢

臣方煒按禍復

命誼來貢遵前約也時陪臣皆至言嬖臣洪倫殺顯
仁人誅倫立禍明祖以殺中國命使其罪大非朝貢
如約不免興師問罪乃賜勅遣歸之事詳大事記謹
附識

朝鮮傳權臣李仁人以辛旽子禍主國事

臣方煒按

朱國禎朝鮮記以李成桂為李仁人子然以傳考之

則係異族觀後禮部議可見且此奏中上言權臣李
仁人下言大將李成桂則國禎記當未可據謹識

朝鮮記帝以表文語慢詰責之

臣方煒按金世宗時

朝鮮表賀稱進玉帶啓函但小石數枚世宗以小國
不與較至是入貢復雜空紙於表函中故特加嚴諭
詳載大事記謹附識

朝鮮傳先是建州長童倉避居朝鮮界已復還建州朝
鮮言昔以窮歸臣臣遇之善今負恩還建州李滿住

所慮其同謀

臣方煒按李滿住乃建州指揮李顯

忠之子顯忠本名釋嘉努以功賜姓名見明永樂實

錄謹附考

朝鮮傳天順三年遼將奏有建州三衛都督私與朝鮮

結恐為中國患

臣方煒按天順初其國王與鄰部

仇殺廷議遣給事中張寧都指揮武忠往寧乃宣德

威施禍福因請寧忠閱兵忠挽弓射雁應弦而落國

人大懼服謝咎解兵詳見大事記謹附考

朝鮮傳琮遣中樞府知事康純統衆萬餘渡鴨渚發豬

二江

臣

方煒按發豬江一統志及高麗志俱不載

惟方輿記要有之云即黑龍江別名也至九獮府識
大錄作兀彌二名俱不載他書考一統志鳳凰城外
近朝鮮界有九連城故址金時幹魯所築以捍高麗
者或明時訛為九獮而識大錄又訛作兀獮耳謹仍
原文而考識之

朝鮮傳眈病篤以所生子幼命其兄故世子暉之子嬰

權國事

臣方煒按大事記載眈子病廢以兄子嬰

嗣與傳互異謹附考

朝鮮傳權臣李仁人誅倫萬生而立禍擢成桂為門下

侍中

臣

方煒按疏言成桂非李仁人子甚悉考原

疏謂李仁人乃京山府吏長庚之裔此傳未及謹附

識

朝鮮傳正月峒咨稱福建人從無泛海至本國者

臣

方煒按是時峒獲福清通番人馮淑等并貨物解遼

東故有此咨事見朝鮮記謹附考

朝鮮傳三十五年五月有倭船四自浙直敗還漂入朝

鮮境

臣

方煒按嘉靖六年六月大內災垣上表奉

慰且封子顗清為世子傳未及謹附識

朝鮮傳秀吉遂分渠帥行長清正等率舟師逼釜山鎮

臣

方煒按一統志釜山在朝鮮東萊州南二十一

里西北去國城千四百里濱大海與日本對馬島相

望謹附考

朝鮮傳遊擊史儒等率師至平壤戰死

臣方煒按記

事本末史儒師至平壤不諳地利且霖雨馬逸奔不止遂戰死謹附考

朝鮮傳如松既勝輕騎趨碧蹄館敗退駐開城

臣方

煒按碧蹄館去王京三十里時如松馳至大石橋馬蹶幾斃倭倅至圍數重將士殊死鬪矢且盡倭前縛李將軍甚急裨將李有昇以身蔽如松刃數倭竟中鈎墮為倭支解會楊元援兵至乃得潰圍出事詳記

事本末謹附識

朝鮮傳詔小西飛入朝

臣方煒按小西飛係倭使沈

惟敬同來請款者見紀事本末謹識

朝鮮傳乃檄楊元屯南原吳惟忠屯忠州

臣方煒按

時大學士張位請屯田開城平壤以資軍興朝鮮恐
中國吞并以嶢峒為辭議遂請事見紀事本末傳未
及謹附識

朝鮮傳麻貴發兵守稷山

臣方煒按稷山在忠州西

與青山相近稷山之南即天安郡城南下全州要道
時倭陷全羅故貴守此以遏其鋒謹識

朝鮮傳士卒物故者二萬上聞之震怒乃罷鎬聽勘

臣方煒按是時鎬貴會同邢玠露布誑奏尉山大捷
諸營上簿書士卒亡者二萬鎬大怒駁正止稱百餘
人繼為贊畫丁應泰所劾上震怒欲付法輔臣趙志
皋力救乃罷鎬等聽勘見明實錄謹附考

朝鮮傳二十七年四月以平倭詔告天下

臣方煒按

時論東征功首陳璘次劉綎次麻貴而董一元始破
三寨終掃諸巢功亦錄邢玠萬世德等進秩有差楊
鎬以原官叙用棄師楊元通倭沈惟敬則先後棄市
詳明實錄傳未及謹識

朝鮮傳四十七年楊鎬督馬林杜松劉綎等出師為我
大清兵所敗朝鮮助戰兵將或降或戰死

臣方燁按己

未二月明帝命經畧楊鎬統兵二十萬號四十萬分
五路來攻朝鮮兵隸南路出寬甸口為

大兵敗於薩爾訐其兵將多降此征服朝鮮之始謹識

朝鮮傳四年四月封琮為國王

臣

方煒按朝鮮記天

啓五年編修姜曰廣給事中王夢尹奉詔至朝鮮察
鎮江軍情傳未及謹附記

朝鮮傳七年三月兵部上文龍揭言麗官麗人招敵攻
鐵山傷我兵千人殺麗兵六萬焚糧百餘萬敵遂移
兵攻麗矣

臣

方煒恭按天啓七年為我

朝天聰元年維時大貝勒阿敏貝勒濟爾哈朗等征朝鮮

屢戰克捷遂克義州搗鐵山又克安州至平壤城朝鮮國王遁江華島至崇德元年遂平之立碑於駐軍地此為臣朝鮮之始謹識

明史卷三百二十考證